

03 MAR 1998

Mahathir-Bonus

BAKI BONUS KAKITANGAN AWAM DIBAYAR JIKA KERAJAAN MAMPU, KATA MAHATHIR

PETALING JAYA, 3 Mac (Bernama) -- Perdana Menteri Datuk Seri Dr Mahathir Mohamad berkata hari ini kerajaan akan membayar baki bonus kepada kakitangan awam yang dijadualkan pada bulan April selagi ia mampu berbuat demikian.

Katanya beliau menyerahkan soal itu kepada Timbalannya Datuk Seri Anwar Ibrahim selaku Menteri Kewangan untuk menentukannya.

"Selagi kita mampu kita akan bayar (bonus), tapi kalau kita tidak mampu macam mana kita nak bayar," katanya ketika ditanya pemberita semasa melawat Institut Teknologi Kreatif Limkokwing (LICT) di sini.

Apabila ditanya sama ada kerajaan sekarang berkemampuan untuk membayar bayaran kedua bonus sebulan gaji yang diperuntukkan kepada kakitangan awam, beliau berkata:

"Bonus bukan delayed pay (bayaran yang ditangguh). Bonus diberi apabila kita mempunyai pendapatan yang mencukupi. Sesetengah orang anggap bonus sebagai satu hak. Ia bukan hak. Ia adalah sesuatu balasan kerana keadaan mengizinkan ataupun kerana sumbangan kita terhadap pendapatan, jadi baru kita ada bonus.

"Kalau bonus dianggap sebagai hak, itu menjadi bayaran yang ditangguh sahaja, tak ada insentiflah, dia tak jadi insentif."

Anwar mengumumkan bayaran bonus sebulan gaji atau bayaran minimum RM700 kepada semua kakitangan awam kecuali pegawai tingkatan tertinggi C ke atas semasa membentangkan Belanjawan Negara 1998 di Dewan Rakyat pada 17 Okt lepas.

Pembayarannya dibuat dalam dua ansuran, yang pertama sebanyak RM500 dibayar pada Disember lepas sementara bakinya dijadual dibayar pada bulan depan.

Bonus yang dijanjikan itu adalah yang kelima diberi oleh kerajaan sebagai penghargaan kepada sumbangan kakitangan awam meliputi semua kumpulan termasuk polis dan tentera bagi menjamin keamanan dan kejayaan program pembangunan negara.

Kali pertama kerajaan membayar bonus ialah pada 1993 apabila 850,000 kakitangan awam mendapat setengah bulan gaji atau minimum RM400 diikuti dengan sebulan gaji atau RM600 minimum pada 1994 dan 1995 manakala pada tahun 1996 ialah sebulan gaji atau minimum RM700 bagi kumpulan terendah.

Kongres Kesatuan Pekerja Dalam Perkhidmatan Awam (Cuepacs) ketika dihubungi berkata ia tetap menaruh harapan agar kerajaan membayar baki bonus itu seperti yang dijanjikan.

"Cuepacs memahami masalah kerajaan yang terpaksa menangani masalah kegawatan ekonomi negara...tapi kita tetap yakin kerajaan akan bayar baki bonus itu," kata Timbalan Setiausaha Agung Cuepacs Abdul Rahman Manan.

Menurut beliau, bonus itu merupakan insentif kepada kakitangan awam yang telah menunjukkan prestasi cemerlang pada tahun lepas.

Ketika ditanya mengenai langkah Cuepacs seterusnya jika bonus itu tidak dibayar, Abdul Rahman berkata kongres itu akan menemui Perdana Menteri dan timbalannya untuk mendapatkan penjelasan sebenar.

"Kita perlu mendapatkan penjelasan supaya dapat diterangkan kepada anggota kesatuan," katanya.

Menurut beliau, dalam pertemuan dengan Ketua Pengarah Jabatan Perkhidmatan Awam Tan Sri Dr Mazlan Ahmad bulan lepas, Cuepacs telah membuat cadangan untuk memotong satu peratus atau RM10 daripada baki bonus kakitangan awam yang akan dibayar itu.

Jika kesemua 850,000 kakitangan awam bersetuju dengan langkah itu, sekurang-kurangnya RM8.5 juta dapat dikumpulkan dalam satu dana yang boleh digunakan untuk membantu memulihkan ekonomi negara, katanya. -- BERNAMA
AFY HJ NMO